

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Upate Ni vawiin khan Social Welfare Minister Pi Lalrinpuii’n kum upa golden card nei ten sorkar dmdawiin chauh ni lovin state pawn damdawiin tha tak takah te an hmang thei tawh a ti.
- 2. Mizoram chu hmarchhak biala a thlawna thisen pe tha ber niin, ram pum huapa hmeichhia thisen pe tha ber state a ni bawk.
- 3. Bawm hnam kut Tlanglut Kut lawmna leh 2nd International Bawm Cultural Meet Khawmawi Playground-a buatsaih chu Chief Minister Pu Lalduhoman Kut Pa niin a telpui.
- 4. Union Cabinet chuan central sawrkar hnuaia thawk leh pensioner zawng zawngte tan Dearness Allowance (DA) leh Dearness Relief (DF) zaa 3 in a ti pung



INTERNATIONAL DAY OF OLDER PERSONS

Social Welfare Minister Pi Lalrinpuii’n kum upa golden card nei ten sorkar hospital chauh ni lovin Kolkata, Delhi, Guwahati leh Silchar thlengin damdawi in tha tak takah te an hmang thei tawh tih a sawi.

He thu hi vawiina National Programme for Health Care of the Elderly, NHM leh Social Welfare Department tangkawpin Chanmari YMA Hall-a an buatsaih, Khawvel Huap Kum Upate Ni lawmnaah sawiin, Social Welfare Minister chuan ZPM chuan sorkarna an siam hma atanga an au hla chu kum upate dinhmun chawisan a ni ang tih a nih angin, kum 2023-a Sorkarna an chan hnu lawkah tar pension chu cheng 1000 in an dawmkang chho a ti a, hriselna lama kum upa te pawh huam thei tur Mipui Health Care an siam tih sawiin, sorkar hnathawk pension tawh te pawhin an hmang tangkai hle a, an chhungte thlengin an dil sak thei tawh a ti a, kum upa golden card neite chuan sorkar hospital chauh ni lovin Kolkata, Delhi, Guwahati leh Silchar thlengin damdawi in tha tak takah te an hmang thei tawh tih a sawi bawk a ni.

Byte: Social Welfare Minister

Vawiina Khawvel Huap Kum Upate Ni lawmnaah hian kum 100 tling chinte hnenah lawmpuina thilpek a hlan a ni a. He hun hi Mizoram pumah MUP huaihawtin urhsun taka hman a ni.

<><><>

NPS PROTEST

Mizoram Movement for Old Pension Scheme (MIMOPS) ten Old Pension Scheme hman phutin wawiin khan Aizawl Vanapa Hall kawtah an pungkhawm.

Mipui SFX

MIMOPS hi Mizoram sawrkar hnathawk zinga National Pension Scheme (NPS) hman te an ni a, an punkhawmnaah hian MIMOPS Vice President V.L. Chhakchhuak chuan thusawiin, sorkar laipui hnuaia hnathawkte tan National Pension System, New Pension Scheme ti-a hriat lar a siam chu Mizoram sorkar pawhin kum 2010 atang khan a hman ve tan a, sorkar laipui hnuaia NPS aiin Mizoram sorkar hnuaia NPS chu kawng hnihin a chhe leh zual tih sawiin, sorkar laipui chuan kum 2016 August ni 26 atang khan Retirement Gratuity benefit chu NPS hmangtute chanvo atan a phal sak a, Central sawrkar chuan NPS matching Contribution chu kum 2021 August ni 26 atang khan zaa 10 angin zaa 14 ah a tipung tawh baw a ti a. Tun dinhmunah Mizoram sawrkar hnuaiah NPS hmangtu mi sing 1, sang 1, 620 awmin, sorkar hnathawk zinga zaa 35.8 an tling a ti. Mizoram sawrkar chuan NPS matching contribution atana thla tin a sen mek chu cheng vbc 6.5 vel a ni a, Old Pension Scheme hman tir se thla tin regular monthly expenditure tam tham tak, pung zel baw si chu a hman a ngai tawh dawn lova, sum harsatna sutkianna tangkai tak a ni thei a ti a, sawrkar pakhat hnuaia pension Scheme pahnih inthlau lutuk awm chu a fuh lo tih sawiin, hnathawkte chu ang khata en turin Mizoram sorkar an phut tih a sawi a ni.

<><><>

NATIONAL VOLUNTARY BLOOD DONATION DAY

Mizoram chu hmarchhak biala a thlawna thisen pe tha ber niin, ram pum huapa hmeichhia thisen pe tha ber state a ni bawk.

He thu hi vawiina National Voluntary Blood Donation Day puala Hrangbana College, Aizawl a hmannaah MSACS Project Director, Dr. Jane Rinsangi Ralte chuan sawiin Mizoram chu a thlawna thisen peka ram pum huapa ti tha zingah a tel a, hmarchhak bial bikah phe chuan pakhatna a ni a ti. Vawiin hian AIIMS, Delhi-ah Directorate General of Health Services-a national blood transfusion services atangin Mizoram aiawhin Health Department officer in chawimawina hi a dawng a ti a, India ram pumah hmeichhe thisen pe zat chawhrual zaa 5 a nih lain, Mizoramah chuan zaa 30 a ni a, hmeichhe thisen pek lamah Mizoram chuan ram pumah a ti tha lawr lak a ni a ti bawk.

Byte : Dr Jane Ralte

He hun hmanpuitu Pu Jeje Lalpekhlua, MLA pawhin thusawiin, kalkhawmte chu an pian leh seilenna Mizoram ti hmingtha tur leh tihmasawn turin thisen pek a ni emaw an theihna zawnah theihtawp chhuah turin a sawm a ni.

Byte: Jeje Lalpekhlua

Vawiina National Voluntary Blood Donation Day hmannaah hian Mizo hmeichhe zinga a thlawn a thisen vawi 20 pe chin leh College leh University zirlai hmeichhe zinga thisen vawi 10 pe tling tawh te hnenah chawimawina hlan a ni a, Mizoram hmun dangah pawh hman a ni.

<><><>

SUPPLIES DISRUPTED

Mizoram chak lakluhna kawngpui te a chhiat nasat avangin Mamit khawpuiah tuialhthei phur lirthei a kal thei lova, hemi avang hian tuialhthei a harsa tawh hle.

Mamit khawpuiah hian tuialhthei hralh leh lakna Indian Oil filling station 1 awmin thla hmasa September ni 18 atang khan hralh tur an nei tawh lova, a black-a zuar thenkhat la awm ve mahse a to hle niin kan corr chuan a sawi a ni.

Mamit-a Tuialhthei hralhna hmunpui/Filling Station a thawktute chuan Mamit ah hian tuialhthei te hi Bairabi atangin National Highway 6 atangin an lalut thin a, tun dinhmunah Mamit leh Bairabi inkar kawng National Highway 6 chu lirthei kal theih loh khawpin a chhia a, tuialhthei phur lirthei tank lorry te pawh an kal thei lova, kawng that hun tur hi ala hriat loh avang leh Tuialhthei hi Aizawl lam kawng National Highway 108 pawh a chhiat tho bakah Indian Oil atangin tuialhthei phurh phalna temporary permit an la hmuh loh avangin an la phur thei lova tuialhthei an neih hun tur anla hre theilo a ni.

Hetihlai hian, Lungleiah chuan Eirawngbawlina Gas a harsa hle tih Lungleia kan corr chuan a sawi, Sairang leh Kawnpui inkar kawng chhiat vang a ni.

Lunglei a Gas agent hlun tak Southern Gas atanga thudawn danin July thla vela kawng chhiat atang khan Gas supply an dawng mumal tawh lova, dan pangngaia Mizorama nitin truck trip 40-50 lo lut thin kha tun dinhmunah chuan Truck trip 10- 15 vel chauh a lo thleng a, hei hi Mizoram pumah sem rual anih si avangin an in daih lo hle an ti.

Hetihlai hian Southern Gas chuan DCSO hialin a nawrpui thin a, hei hian tlem chuan chhan mahse, mipui mamawh an puhru zo lo hle a, a lo thleng hmasa apiang mipuiah hralh chhuah a ni a, Local Council 24 bakah Thaizawl, Bualte leh Sairep an chawm bawk si avangin a harsa hle a ni tih kan corr an hrilh a ni.

<><><>

CM

Mizoram Bawm Student Association in Khawmawi Playground-ah Bawm hnam kut Tlanglut Kut lawmna leh 2nd International Bawm Cultural Meet an buatsaih chu Chief Minister Pu Lalduhoma chuan Kut Pa niin a telpui a

Thusawiin Chief Minister chuan, Bawm ten history-ah lal ropui tak a nei a, Vanhnuaitlir a ni a. Ani hian a vanglai chuan tuna Paletwa leh a chhim lam ram zau tak a awp nia sawi a ni a. Chuti taka lal chak leh thiltithei a nih chhan chu a unau hnam peng sawm leh pathum zet a thawhpui vang a ni. Ani khan tanrual hi chakna a nihzia mi a lo zirtir tawh a. A tih dan entawna vawiina Zofate hi an tanrual thiam chuan mahni awmna hmun theuhah hnam chak leh thiltithei tak a nih zel theih a ni a ti.

Chief Minister chuan Mizoramin hmasawna hmel thar a hmuh te tarlangin rel kawng hi Hmawngbuchhuah thlenga kaltir turin sorkar laipui chuan hma a la a ti a, KMMTTP pawh kum 2027 a thawh zawh an tum a. Heng ruahmannate a puitlin hunah chuan chhim lam bial hi a changkang chak hle dawn a ni, a ti bawk.

He hunah hian Khawmawi bialtu MLA Pu Lalramliana Papua chu khualzahawm a ni a, Dr. Lorrain Lalpekliana Chinzah chuan Chief Minister hi a tawiawm a ni.

Mizoramah hian Bawm hi mi 30000 vel an awm niin an sawi a, LADC chhungah leh CADC chhungah an awm tam ber a, LADC ah hian Lai dawta hnam peng lian ber nia sawi an ni. Bangladesh atanga himna zawnga rawn raltlan hi mi 2500 vel an awm bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

DA HIKE

Union Cabinet chuan central sawrkar hnuaia thawk leh pensioner zawng zawngte tan Dearness Allowance (DA) leh Dearness Relief (DF) zaa 3 in a ti pung.Vawiina New Delhi-a chanchinbumite a kawmnaah Union I&B Minister Ashwini Vaishnaw chuan DA pung hi central sawrkar thawk mi nuai 49 sing 2 chuang leh pensioner nuai 68.7 chuangten an hmang thei dawn a ti a. Kumin July ni 1 atanga chhiar tan a ni ang a ti bawk.

Hei bakah hian Union Cabinet chuan Kendriya Vidyalaya thar 57 din a rem ti bawk a. KV school din nan hian cheng vaibelchhe sang 5 leh 782 ruahman a ni a ti a. Zirlai sing 8 sang 7 chuang an lut thei dawn a. Zirtirtu sang li leh zaruk chuang lak an ni ang a ti bawk

<><><>

SEVA PARV

Mipui rawngbawl leh sawrkar inrelbawltha thupuia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv hunah chuan Modia sawrkarin khawvel ramdangte nena thawhhona tha a siam dan tarlang ila. PM Modia hnuaiah India chu khawvel dawhsanah a pawimawh berte zing ami a ni tawh a. Pu Modia hnuaiah khawvel chhim lam ram Global South te hmasawna tur khawvelin a hawi mek a. COVID-19 hrilen laia ramdangte hnena vaccine phal taka a pek avangin ram hmasawn mekte dinhmun khawvelin a ngaihpaawimawh phah sawt a ni.

<><><>

RSS

Prime Minister Narendra Modia chuan RSS te chuan chawl lovin ram rawng an bawl a ti. Vawiina RSS kum 100 tlin lawmna New Delhia neih a hmanpui naah he thu hi sawiin Pu Modia chuan RSS te chuan khawtlang nun an siamtha a ti a. Ram inpumkhatna tura an tha thawh a ropui hle a ti a. RSS chuan ram indin chhohna turah theihtawp an chhuah tih sawiin kum sang chuang hnam ro hlu lo neih tawhte an rawn kaitho leh a ni a ti.



GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST thar hi kut themthiamna lama sumdawng tan a tha hle a. Sumdawng te, thiamthil siamtute leh a lo leituten an chhawr vek dawn a. Nitina mamawh ceramic pot leh bur te, porcelain leh terracotta bungbel mante a tlawm dawn a. Choka bungruaah chhiah zaa 12 lak thin chu zaa 5 chuah lak anih tak avangin mipuite tan man tlawm takin a lei theih tawh a ni.

